



Votaziun chantunala dal pievel dals 24 da settember 2006

Explicaziuns dal cussegli grond

Revisiun parziale da la constituziun chantunala

Project 1

La nova constituziun chantunala è entrada en vigur il 1. da schanner 2004. Ella prevesa che – ultra da la constituziun e da las leschas en il senn formal – pon vegnir relaschadas er ordinaziuns. Dentant ha l'autur da la constituziun limità la cumpetenza da relaschar ordinaziuns al cussegli grond ed a la regenza. La constituziun chantunala fixescha plinavant che mo ils aspects main impurtants pon vegnir regladis en in'ordinaziun. Disposiziuns pli impurtantias ston vegnir regladis sin il stgalim d'ina lescha. En la constituziun chantunala vertenta n'èsi betg previs da dar in dretg d'ordinaziun als instituts chantunals autonoms. En la session d'avrigl 2005 aveva il cussegli grond incumbensà la regenza da crear la basa constituziunala per delegar cumpetenças legislativas ad instituts chantunals autonoms. Uschia duai vegnir tegnì quint dal fatg ch'ils instituts chantunals autonoms han – ultra da lur dretg da s'organisar en moda autonoma – in basegn d'esser activs en regard legislativ. La cumpetenza duai perencunter sa restrenscher sin relaschar in dretg d'ordinaziun. Ils instituts pon uschia relaschar mo las disposiziuns main impurtantias.

Explicaziuns a partir da p. 3

Revisiun parziale da la lescha chantunala da chatscha

Project 2

Cun la lescha da chatscha vertenta da l'onn 1989 èsi vegnì dà dapli paisa a la persistenza ed a l'ecologia e la selvaschina è vegnida messa en il center da la focussiun. En la revisiun parziale deliberada ussa dal cussegli grond vegnan mantegnidas questas finamiras. Ils motivs per questa revisiun èn stadas en emprima lingia las intervenziuns parlamentararas. Adattadas èn vegnidas er singulas disposiziuns ch'en sa cumprovadas mo parzialmain en l'execuziun. Ils puncts centrals da la revisiun èn:

- temps da chatscha flexibels il settember per augmentar la preda da la chatscha auta;
- reducir la vegliadetgna minimala per ir a chatscha a 19 onns;
- facilitar la chatscha per chatschadras e per chatschaders cun impediments;
- obligaziun generala d'absolver in tir da regulaziun per las armas da chatscha avant il cumenzament da la chatscha en l'interess da la protecziun dals animals;
- utilisaziun liada ad in intent da las taxas da patenta e da las taxas da prelevaziun;
- concepziun pli flexibla da las taxas da patenta per chatschadras e per chatschaders extrachantunals.

Explicaziuns a partir da p. 5

Project da votaziun p. 14

Stimadas conburgaisas e stimads conburgais

Nus As preschentain ils sustants projects per la votaziun:

Revisiun da l'art 50 da la constituziun chantunala (delegaziun da cumpetenzas legislativas als instituts chantunals autonoms)

(Project 1)

Pertge ina delegaziun da la legislaziun?

Ils instituts autonoms da dretg public han in tschert dretg da s'organisar en moda autonoma. Tar ils instituts chantunals autonoms tutgan ils servetschs psychiatrics dal Grischun, il center da furmaziun per la sanadad ed ils fatgs socials, la scola auta professiunala da pedagogia, l'institut d'assicuranza d'edifizis, l'institut d'assicuranza sociala ed auters. Questa enumeraziun exemplara mussa ch'ils instituts han per part incumbensas fitg differentas. Perquai èn er ils basegns da regulaziun dals instituts fitg differentes. En il center stattan regulaziuns dal sectur da persunal ed er per ademplir las incumbensas centralas.

Tut ils instituts ensemens han il basegn da disponer er da cumpetenzas legislativas. En il center stattan regulaziuns en il dretg da persunal ed er en il sectur da las incumbensas centralas d'in institut. Els duain obtegnair la pussaivladad da prender sezs las regulaziuns tipicas per lur in-

stitut e per lur manaschi. Pensar ston ins qua a las regulaziuns dals servetschs da notg, da dis da festa e da las fins d'emna sco er dals servetschs da pichet dentant er als reglaments da perfecziunament e da perscrutaziun, als urdens da scola ed a las reglamentaziuns per agens andaments da manaschi. La cumpetenza da regulaziun renda abels ils instituts da pudair agir en moda pli flexibla e pli sperta e da pudair reagir sin influenzas externas. Las incumbensas ed ils basegns dals differents instituts sa distinguon fermamain, perquai pari d'esser materialmain inditgà ch'ils instituts reglian sezs queste secturs e ch'els possian tegnair uschia meglier quint dals basegns tipics per lur institut.

Concepziun

La delegaziun previsa da cumpetenzas legislativas als instituts chantunals autonoms pretenda ina midada da la constituziun chantunala. L'artitgel 50 da la consti-

tuziun chantunala, en il qual i sa tracta da las instanzas pertadras d'autras incumbensas publicas, duai veginir complettà cun in alinea 3.

L'alinea 3 proponì fixescha duas premissas. Delegada vegin mo la cumpetenza da relaschar in'ordinaziun («uschenavant che la furma da la lescha n'è betg prescritta...»). Tenor la chapientscha da la constituziun chantunala vegin delegada mo la regulaziun da cuntegns main impurtants. Cun la restricziun legala generala vegin plinavant garantì che tut las chaussas impurtantas èn cuntegnidas en la lescha en il senn formal. Ina delegaziun per relaschar disposiziuns impurtantas als instituts è uschia exclusa tras il dretg constituzional. Instituts na pon relaschar naginas leschas. La delegaziun vegin restrenschida als aspects main impurtants.

Plinavant pretendia il nov alinea 3 che la delegaziun stoppia veginir fixada en ina lescha («ch'el vegin autorisà explicitamain da la lescha da far quai...»). I basegna uschia ina regulaziun speziala en ina lescha (speziala) correspundenta. La basa constituziunala proponida na cuntegna anc betg ina norma da delegaziun. Questa norma sto veginir integrada en ina lescha correspundenta. Ina delegaziun directa

na pudess dentant er betg ademplir ils differents basegns dals singuls instituts autonoms. Il legislatur ha pia anc adina la pussaivladad d'examinar la correctedad d'ina delegaziun, e quai cun tractar la singula lescha speziala da cas a cas.

En la lescha dal persunal ch'è veginida tractada il zercladur 2006 en il cussegl grond è veginida integrada ina norma da delegaziun per il sectur da persunal. Ils instituts chantunals autonoms veginan a relaschar en il futur sezs las disposiziuns executivas tar la lescha dal persunal. Per ch'ils instituts possian er en il futur fixar regulaziuns en ordinaziuns per ils secturs centrals tipics per lur institut, basegni anc la basa legala correspundenta sin plaun d'ina lescha.

Proposta

Il cussegl grond ha tractà la revisiun parziala da la constituziun chantunala (artitgel 50 alinea 3) en la sessiun da zercladur 2006 e l'ha deliberada cun 89 counter 0 vuchs per mauns da la votaziun dal pievel. Nus As proponin, charas conburgaisas e chars conburgais, d'acceptar questa revisiun da la constituziun.

Revisiun parziala da la lescha davart la chatscha e la protecziun da selvaschina en il chantun Grischun (lescha chantunala da chatscha)

(Project 2)

Ils 14 da favrer 2006 ha il cussegl grond approvà cun 97 cunter 0 vuschs la revisiun parziala da la lescha chantunala da chatscha. Cunter quest conclus è vegnì fatg in referendum. Nus As preschentain perquai il suandard project per la votaziun.

A. Il project da votaziun en detagi

Cun la revisiun parziala da la lescha chantunala da chatscha duain vegnir cuntanschidas las suandardas finamiras:

- temps da chatscha flexibels il settember per augmentar la preda da la chatscha auta;
- reducir la vegliadetgna minimala per ir a chatscha a 19 onns;
- facilitar la chatscha per chatschadras e per chatschaders cun impediments;
- obligazion generala d'absolver in tir da regulaziun per las armas da chatscha avant il cumenzament da la chatscha en l'interess da la protecziun dals animals;
- utilisaziun liada ad in intent da las taxas da patenta e da las taxas da prelevaziun;
- concepziun pli flexibla da las taxas da patenta per chatschadras e per chatschaders extrachantunals.

1. Situaziun da partenza

Legislaziun da chatscha e planisaziun da la chatscha

La novaziun la pli impurtanta da la lescha da chatscha da l'onn 1989 è stada l'introducziun da la planisaziun da la chatscha. Cun quella èsi vegnì dà dapli paisa a la persistenza ed a l'ecologia e la selvaschina è vegnida messa en il center da la focusiun. Cun la planisaziun da la chatscha èn vegnids elavurads concepts da chatscha che dattan la prioritad al bainstar da la selvaschina e che resguardan tuttina las tradiziuns da chatscha.

La finamira da la planisaziun da la chatscha è da mantegnair effectivs da selvaschina sauns, ch'en structurads en moda naturala ed adattads a lur spazi da viver. Effectivs memia gronds surexploteschan numnadamaain il spazi da viver tradizunal ed in surpli d'animals feminins e d'animals giuvens ha per consequenza ch'i dat grondas colonias da selvaschina e – baud u tard – grondas perditas tras selvaschina disgraziada sco er donns da selvaschina excessivs.

Las finamiras cumbinadas cun la planisaziun da la chatscha ha il chantun Grischun cuntanschi quasi dal tuttafatg. Dal puntg da vista da la vegliadetgna e da la schlattaina èn ils effectivs da tschiervs, da chavriels e da chamutschs per gronda part structurads en moda naturala. Els

han pudi vegnir adattads al spazi da viver regional che exista en las regiuns. Er las perditas tras selvaschina disgraziada èn perquai vegnididas reducidas cleramain. Ultra da quai han pudi vegnir reducids ils custs annuals per ils donns da selvaschina ils ultims onns, e quai da 500000 francs a 100000 francs. A medem temp resultan da la chatscha grischuna da patienta constantamain grondas predas. Tuttina èsi sa mussà ch'ils effectivs naturals da tschiervs e da chavriels na sa laschan betg regular mo cun la chatscha auta suletta. La stabilisaziun necessaria dals effectivs da tschiervs e da chavriels pretendia dentant ina chatscha d'atun cumplementara durant ils mais da november e da december.

Ina incumbensa impurtanta ademplescha la planisaziun da la chatscha dentant er per la chatscha bassa. Per questa chatscha stoi vegnir garantì che l'effectiv da niginas spezias da selvaschina vegnia periclità. Per quest intent ha il chantun – ensemes cun las chatschadras e cun ils chatschaders sco er cun las ornitologas e cun ils ornitologs – sviluppà programs da surveglianza. Quests programs gau dan oz vasta renconuschientscha er sur ils cunfins dal chantun or.

2. Finamira

La revisiun parziala concludida dal cussegl grond na mida nagut vi da la finamira prendida en egl l'onn 1989 d'adattar ils effectivs da selvaschina en moda uschè naturala e protegida sco pussaivel – tenor las enconuschentschas da la biologia da la selvaschina – al spazi da viver ch'è anc existent. Ina tala chapientscha raziunala da la chatscha cumpiglia l'ambient en sia

totalitat e vul gidar a spargnar suffrien- tschas evitables a la selvaschina.

3. Puncts centrals da la revisiun

Temps da chatscha flexibels durant la chatscha auta

Ina reordinaziun legala dals temps da chatscha sto satisfar a pliras pretensiuns. Da ponderaziuns en favur da la biologia da selvaschina sto vegnir resguardà il temp da paregliament dals tschiervs. La finamira generala è anc adina da cuntanscher – il settember – ina quota uschè auta sco pussaivel dal plan da prelevaziun per pu dair regular l'effectiv. Da nov duai la chatscha auta avair lieu durant il temp dal 1. fin ils 30 da settember. Ella dura dentant sco fin ussa maximalmain 21 dis. La regenza vegn autorisada d'ordinar ina interrupziun da la chatscha d'almain trais dis successivs. Questa regulaziun porscha ina flexibilitad maximala per fixar il temp da chatscha.

Vegliadetgna minimala per ir a chatscha

La vegliadetgna minimala per ir a chatscha duai vegnir reducida da 20 a 19 onns. En quest connex duai esser decisiva l'annada e betg pli l'onn da vegliadetgna cumpli. Questa novaziun è – sper la meglra pur schida da curs d'instrucziun – in agid im pertant per sveglier ad ura l'interess dals giuvenils per la chatscha e per la tgira.

Chatschadras e chatschaders cun in impe diment fisic

Da nov vegn la regenza autorisada da permetter facilitaziuns d'ir a chatscha per chatschadras e per chatschaders cun in impediment fisic. Uschia vegni tegnì quint da la pretensiun d'evitar dischavantatgs.

Tir da regulaziun per las armas da chatscha

La gronda part da las chatschadras e dals chatschaders ademplescha gia oz la lescha nunscriitta d'exercitar la segirezza da culp e da regular l'arma da chatscha avant che la chatscha cumenza. En l'interess da la protecziun dals animals vegn questa obligaziun fixada da nov expressivamain en la lescha per tut las chatschadras e per tut ils chatschaders.

Utilisaziun da las taxas da patenta e da las taxas da prelevaziun

Ils ultims onns èn vegnidus surdadas numerusas novas incumbensas en il securt da la protecziun da las spezias e dals biotops a l'uffizi da chatscha e pestga. Da questas incumbensas fan part per exemplpel la protecziun dals spazis da viver da la selvaschina, la promozion da la diversidad da las spezias sco er incumbensas en connex cun la survegllanza da las spezias da selvaschina protegidas. Da nov sto il retgav da las taxas da patenta e da las taxas da prelevaziun sco er da las ulteriuras entradas da la chatscha cuvrir almain tut ils custs dals organs da chatscha.

Import da las taxas da patenta e da las taxas da prelevaziun

Las taxas da patenta per chatschadras e per chatschaders cun domicil en il chantun Grischun na vegnan betg augmentadas, cun excepcziun da la chareschia. Per chatschadras e per chatschaders senza domicil en il chantun vegnan las taxas da patenta fixadas da nov entaifer ina dimensiun prescritta da la lescha.

B. Ils arguments dal comité da referendum

Pertge che nus na giain betg d'accord cun la revisiun parziala da la lescha da chatscha:

- **Il comité da referendum defendia ina chatscha pli confurma als princips etics ed a las prescripcziuns legalas, cun pli bler cor e cun pli blera atgna responsabladad.**
- **Nus ans engaschain per ina protecziun consequenta dals animals-mamma e dals animals giuvens ed evitain uschia che animals-mamma che laschan anc tettar, che ansiels e che vadels vegnian sajettads.**
- **La chatscha speziala sin selvaschina d'ungla fin ils 20 da decembre n'è betg acceptabla.**
- **Ina chatscha confirma a las prescripcziuns munta per nus che la chatschadra e ch'il chatschader po sajettar immediat er selvaschina d'ungla betg permessa, sch'ella è malsauna u blessada.**

1. Ins sto chalar da sajettar animals-mamma che laschan anc tettar ensemes cun lur ansiel/vadé (protecziun generala dals animals-mamma e dals animals giuvens)

Funtauna:

Lescha federala davart la chatscha e la protecziun dals mamifers ed utschels selvadis, part 3, art. 7 cifra 5 e lescha federala davart la protecziun dals animals.

Enconuschiantscha:

Il dretg surordinà da la lescha chantunala da chatscha è la lescha federala davart la

chatscha. En la lescha federala vertenta vegn la regulaziun da la protecziun dals animals-mamma e dals animals giuvens transferida explicitamain als chantuns. Ins sto respectar e proteger la dignitat dals animals sco che quai è francà en la nova lescha federala davart la protecziun dals animals. Cun prelevar sistematicamain animals-mamma che laschan anc tettar na vegn la dignitat da l'animal betg resguardada. I cuntrafa medemamain a l'etica da sajettar ansiels u vadels. Per la planificaziun da la chatscha èn talas prelevaziuns nungiustifitgadas.

Nossa finamira:

Sin animals-mamma che laschan anc tettar e sin ansiels/vadels na vegni en general betg pli fatg chatscha.

Nossa proposta:

La protecziun generala dals animals-mamma e dals animals giuvens sto vegnir integrada sco princip en la lescha chantunala da chatscha. Il cussegl grond sto reglar ils detagls areguard questa protecziun en las disposiziuns executivas tar questa lescha.

Cun quai ch'els na contribueschan l'emprim onn betg ad augmentar il dumber, pon ins far chatscha sin ils ansiels e sin ils vadels confurm a las prescripcziuns in onn pli tard.

La chatscha na dastga betg privar ils animals-mamma che laschan anc tettar da lur rolla usitada d'alleviar animals giuvens. Las structuras socialas da la selvaschina na duain betg vegnir disturbadas tras prelevaziuns nundifferenziadas che chaschun grondas suffrientschas psichicas.

2. Abolir la chatscha speziala en la furma actuala (na a la chatscha en ils quartiers d'enviern fin ils 20 da december)

Funtauna:

Art. 11 temps da chatscha da la lescha chantunala da chatscha.

La chatscha speziala che vegn exequida dapi 1989 en il senn da l'art. 11 alinea 5 da la lescha da chatscha.

Enconuschiantscha:

La circumstanza ch'ins fa chatscha sin chavriels e tschiervs durant la chatscha speziala en ils mais da november e da december, en ina perioda cura che la selvaschina è già stabilida en ses quartiers d'enviern annuals per sa preparar per la stagiu vegnenta, disturba bleras abitanatas e blers abitants dal chantun e n'è ultra da quai betg acceptabla dal punct da vista da l'etica da chatscha. Igl è cumprovà che la selvaschina basegna quietezza absoluta, uschespert ch'ella è sa stabilida en ils territoris nua ch'ella sa prepara per l'enviern.

Uschia ston ins evitar en questa stagiu da disturbar la selvaschina – en tge moda ch'i saja – e tralaschar da provocar stress inutil.

Effectivs da selvaschina confurms a las spezias pon er vegnir garantids senza sajettar animals-mamma che laschan anc tettar e senza sajettar lur animals giuvens.

Ils buns effectivs da tschiervs n'en betg mo sa sviluppads pervi da la chatscha speziala. Auters facturs sco midadas dal lieu dals tschiervs ed in cumportament divers pervia da las structuras socialas disturbadas en consequenza d'ina chatscha meimia severa en il quartier d'enviern e.u.v.

giogan qua ina rolla pli essenziala. Quai signifitgescha ch'il tschierv è abel d'em-prender e ch'el è bun da sa proteger da las chatschadras e dals chatschaders. Spezial-main entras ils asils da selvaschina adina pli frequents è quest mecanissem da protecziun daventà anc pli marcant. Auter tar ils chamutschs e tar ils chavriels.

In exemplel: Las consequenzas da sajettar indifferenziadament ansiels (senza avair vesì, sch'igl è in animal ferm u flaivel) èn bler pli gravantas tier ils chavriels che re-stan pli fidaivels ad in lieu. Uschia ha stùi vegnir reducida la chatscha per quatter dis en il mais da settember e la prelevaziun da chavrolas ha stùi vegnir reducida per in animal per chatschadra u per chatschader, per che l'effectiv da chavriels possia puspé sa revegnir in pau.

La chatscha speziala serva unicamain ad ademplir – exactamain sin il chau – las prelevaziuns annualas, accordadas al dumber precalculà, e quai independentamain dal fatg, sch'i vegnan sajettads ani-mals ferms u flaivels.

La chatscha speziala n'è mai s'establiga tar ina gronda part da las chatschadras gris-chunas e dals chatschaders grischuns; quai conferma il fatg che durant ils 16 onns dapi l'introducziun da quest gener da chatscha la pratitgeschan mintgamai mo ca. 20% da las chatschadras grischunas e dals chatschaders grischuns.

Nossa finamira:

Ademplir – cun mesiras adattadas – ils plans da prelevaziun a la chatscha en il mais da settember.

Nossa proposta:

La lescha da chatscha sto vegnir cum-plettada en quel senn ch'il chantun vegn sfurzà da prender tut las pussaivladads

che stattan a disposizion per ademplir ils plans da prelevaziun a la chatscha en il mais da settember. Da quai fan part la fixaziun d'interrupziuns adattadas da la chatscha, la prolungaziun da la chatscha auta ordinaria e.u.v., sco ch'igl è previs dapi 16 onns en l'artitgel 11 alinea 4 da la lescha da chatscha vertenta. Isto er vegnir ponderà da fixar asils da selvaschina pli pitschens e d'als spustar cun flexibilitat sco er da disturbare la selvaschina entaifer ils territoris da protecziun tras ils organs da survegllanza da chatscha durant la chatscha auta ordinaria.

Per la chatscha da tschiervs èsi da fitgronda impurtanza che la chatscha na vegnia betg terminada avant ils 30 da settember. Sco ch'i demussa la curva da las cifras da prelevaziun da tschiervs en la chatscha auta s'augmentan las prelevaziuns d'in di vers la fin da settember puspé marcantamain.

Las mesiras proponidas vulan cuntanscher che las prescripziuns da prelevaziun vegnan ademplidas entaifer il mais da settember. Per quest intent ston da nov vegnir messas barrieras effizientas e defi-nidas cleramain en la lescha.

3. Ina chatscha confirma a las prescripziuns è in'obligaziun, dent-ant er in dretg per las chatschadras e per ils chatschaders

Funtauna:

Art. 15 da la lescha da chatscha vertenta e revedida parzialmain

Enconuschientscha:

Tenor l'artitgel 15 da la lescha da chatscha vertenta ed er da la lescha da chatscha re-vedida parzialmain vegn la chatschadra u

il chatschader obligà da pratitgar ina chatscha confirma a las prescripcions.

L'obligaziun da la chatschadra e dal chatschader da spendrar immediat selvaschina suffrenta è in dals princips elementars da la chatscha sin l'entir mund.

Nossa finamira:

La chatschadra ed il chatschader ston survegnir il dretg da spendrar immediata main selvaschina d'ungla betg permessa ch'è malsauna u blessada e da la surdar als organs da surveglianza da chatscha.

Pir uschia ademplescha la chatschadra u il chatschader sia emprima obligaziun da chatscha.

Nossa proposta:

Correspondentamain a nossa finamira sto l'artitgel 15 da la lescha chantunala da chatscha vegnir complettà cun in nov alinea.

Questa regulaziun na duai betg valair per epidemias d'animals sco la tschorvadad da chamutschs e.u.v. Uschia vegni garantì che tar malsognas che cumparan en furma d'ina epidemia na resultan betg perditas d'effectivs irreparablas.

Preziadas votantas grischunas, stimads votants grischuns,

sin fundament da las enconuschentschas menziunadas qua survart arrivain nus a la conclusiun ch'i vegn dà memia pauca attenziun als interess da la selvaschina en la lescha vertenta da chatscha.

Nus recumandain perquai da refusar la preschenta revisiun parziala da la lescha da chatscha cun in **NA** e da la returnar a la regenza dal chantun Grischun per la repassar.

Il zercladur 06 Il comité da referendum

C. Ils arguments dal cussegli grond

1. Incaricas dal cussegli grond

Il cussegli grond ha incumbensà la regenza – sin fundament da pliras intervenziuns parlamentaras – d'adattar la lescha chantunala vertenta da chatscha. En il center èn stads spezialmain la decriminalisaziun da la chatscha, ina concepziun pli flexibla dals temps da chatscha durant la chatscha auta sco er ina reducziun da la vegliadet-gna minimala per ir a chatscha. In basegn d'agir ha il cussegli grond dentant vis er en il sectur dal regal da chatscha.

Cun introducir la procedura da multas disciplinarias per simpels surpassaments dal dretg da chatscha l'onn 2004 ha pudi vegnir cuntanschida ina vasta deriminalisaziun da la chatscha. En il rom da questa revisiun parziala da la lescha chantunala da chatscha vegnan – cun introducir temps da chatscha pli flexibels durant la chatscha auta, cun sbassar la vegliadet-gna minimala per ir a chatscha da 20 a 19 onns e cun utilisar en moda liada ad in intent las taxas da patenta e las taxas da prelevaziun – instradadas ulteriuras novaziuns modernas. Cun quai ha la regenza ademplì materialmain tut las incaricas dadas dal cussegli grond.

2. La necessitat da la chatscha speziale

La lescha federala da chatscha ha tranter auter l'intent da mantegnair effectivs da selvaschina sauns sco er da limitar ad ina dimensiun supportabla ils donns da selvaschina en ils guauds e vi da las culturas agriculas. Ils effectivs da selvaschina ston vegnir utilisads en moda persistenta. Rea-

lisadas vegnan questas prescripcions dal dretg federal en il rom da la planisaziun da la chatscha.

La finamira generala è quella da reducir ils effectivs da selvaschina adequatamain, e quai sche pussaivel durant la chatscha auta ordinaria. A cuntanscher questa finamira duai gidar la concepziun flexibla previsa da nov per la chatscha auta. Tuttina èsi sa mussà ch'ils effectivs naturals da tschiervs e da chavriels na sa laschan betg regular mo cun la chatscha auta suletta. Annualmain s'augmentan numnadamain questi effectivs per circa in terz. La regulaziun necessaria dals effectivs da tschiervs e da chavriels pretenda dentant ina chatscha d'atun cumplementara durante ils mais da november e da december. Senza questa chatscha d'atun na po il chantun betg ademplir sia obligaziun da prevegnir cunter donns da selvaschina. Cun la regulaziun fina dals effectivs da tschiervs e da chavriels la fin d'atun duain dentant vegrin utilisads ils effectivs da selvaschina sin plau regiunal ed adaptads al spazi da viver.

Sch'il project vegriniss refusà, na vegriniss la chatscha speziala betg abolida. En quest cas fissan anc adina decisivas las disposiziuns correspondentes dal dretg vertent. In'abolizion senza cumpensaziun da la chatscha speziala cuntrafaschess ultra da quai al dretg federal che pretenda expresivamain in'adattazion dals effectivs da selvaschina al spazi da viver. Perquai ha il cussegli grond stuì declarar gia l'onn 1995 ina iniziativa dal pievel correspondenta per nunvalaivla.

3. Regulaziun dals effectivs da tschiervs e da chavriels

Cun la planisaziun da la chatscha ston ins cuntanscher ina repartiziun da la selvaschina ch'è orientada a la spezia, a la vegliadetgna ed a la schlattaina. Questa finamira na po betg vegrin cuntanschida cun ina protecziun generala dals animals-mamma e dals animals giuvens. Sin la gronda part dals effectivs da tschiervs e da chavriels – numnadaman sin la selvaschina feminina e giuvna – na dastgassi betg pli vegrin fatg sufficientamain chatscha cun ina tala regulaziun. La chatscha dals animals feminins e giuvens è necessaria cunzunt per distgargiar ils quartiers d'enviern da la selvaschina. Uschiglio daventassan ils effectivs da selvaschina ina victima da las murias envernalas che cumparan periodicamain. Avant che questi animals pireschan pervi da flaivelleza e pervi da sutalimentaziun, restan els dentant anc ditg en lur quartier ch'els surexploteschan anc avant lur mort. Gist er ord vista da l'etica vegrin perquai recommandà ed èsi necessari da prelevar l'atun ils animals feminins e giuvens.

Ina protecziun generala dals animals-mamma e dals animals giuvens avess dentant er grevas consequenzas per ils guauds da regiuns entiras. Effectivs me-mia gronds na pudessan dentant betg pli vegrin regulads en la dimensiun necessaria. Ina consequenza fissan donns da selvaschina excessivs en ils guauds e vi da las culturas agriculas. Ultra da quai stuessan las proprietarias ed ils proprietaris da guaud far quint cun scursanidas considerablas da las contribuziuns da la confederaziun, sch'il chantun na pudess betg pli ademplir las prescripcions dal dretg federal per far la planisaziun da la

chatscha. Ina protecziun generala dals animals-mamma e dals animals giuvens impossibilitass d'ademplir las incumbensas da chatscha. Perquai ha il cussegl grond stùi declarar l'onn 1995 ina iniziativa dal pievel correspundenta medemamain per nunvalaivla.

4. Prelevaziun da selvaschina malsavanaugh e blessada

En emprima lingia èn ils organs da surveglianza da chatscha responsabels per sajettar selvaschina malsavanaugh e blessada che n'è betg permessa. Questa regulaziun è sa cumprovada. La surveglianza da chatscha dastga numnadomain er autorisar chatschadras e chatschaders da far prelevaziuns correspundentas. Mantegnair questa pratica adequata è dentant er inditgà perquai che gist selvaschina malsavanaugh na sto betg veginr sajettada adina. Cunzunt tar la tschorvadad da chamutschs po la prelevaziun d'in animal malsauunchaschunar agitaziun en in effectiv da selvaschina e procurar uschia per in'ulteriura derasaziun da la malsogna.

5. Concordanza cun il dretg federal

Numerusas disposiziuns dal dretg chantunal da chatscha – sco per exemplu la protecziun dals animals-mamma e dals animals giuvens – ston veginr approvadas stringentamain da la confederaziun. Questa examinaziun ha purtà il resultat che las adattaziuns correspundentas da la lescha chantunala da chatscha stattan en concordanza cun il dretg federal suordinà. L'approvaziun da questas disposiziuns tras il departament federal per am-

bient, traffic, energia e communicaziun succeda mez avrigl 2006.

D. Proposta

Il cussegl grond ha approvà cun 97 cunter 0 vuschs la revisiun proponida da la lescha da chatscha. Nus As proponin, charas conburgaisas e chars conburgais, d'acceptar quest project.

En num dal cussegl grond

Il president dal cussegl grond:
Hans Geisseler

L'actuar:
Claudio Riesen

Project da votaziun

1

Constituziun dal chantun Grischun

Midada dals 14 da zercladur 2006

Il cussegl grond dal chantun Grischun,
sa basond sin l'art. 101 da la constituziun chantunala,
suenter avair gi invista da la missiva da la regenza dals 7 da mars 2006,
concluda:

I.

La constituziun dal chantun Grischun dals 18 da matg / 14 da settember
2003 vegg midada sco suonda:

Art. 50 al. 3

³ Uschenavant che la furma da la lescha n'è betg prescritta, pon instituts
autonoms dal dretg public chantunal relaschar ordinaziuns, sch'els vegnan
autorisads explicitamain da la lescha da far quai.

II.

Questa revisiun parziale è suttamessa al referendum obligatoric.
La regenza fixescha l'entrada en vigur da questa revisiun parziale.

Project da votaziun

2

Lescha davart la chatscha e la protecziun da selvaschina en il chantun Grischun (lescha chantunala da chatscha)

Midada dals 14 da favrer 2006

Il cussegli grond dal chantun Grischun,

sa basond sin l'art. 31 al. 1 da la constituziun chantunala,
suenter avair gi invista da la missiva da la regenza dals 29 d'avust 2005,

concluda:

I.

La lescha davart la chatscha e la protecziun da selvaschina en il chantun Grischun (lescha chantunala da chatscha) dals 4 da zercladur 1989 vegn midada sco suonda:

Num dal relasch

Lescha chantunala da chatscha (LCC)

Remplazzament d'expressiuns

En ils artitgels 41 (er marginala), 42, 46 alinea 3 e 50 vegn remplazzada l'expressiun "inspecturat da chatscha" tras "uffizi cumpetent".

I. Disposiziuns generalas

Art. 2a

Las indicaziuns davart las persunas, las funcziuns e las professiuns en questa lescha sa refereschan a domaduas schlattainas, uschenavant ch'i na resulta nagut auter or dal senn da questa lescha. Equalitat da las schlattainas

Art. 4 al. 1

¹ I vegnan differenziadas las sequentas modas da chatscha:
chatscha auta, chatscha da capricorns, chatscha bassa, chatscha da guetta e
chatscha cun traplas.

Art. 5 al. 2 lit. a, al. 3 e 4

² Autorisà da prender ina patenta da chatscha è tgi
a) che ha accumpli durant l'onn chalendar il 19avel onn da vegliadetgna ed
è abel da giuditgar;

³ Il dretg da s'annunziar per la chatscha da capricorns premetta ch'il
chatschader respectiv saja i almain tschintg onns a la chatscha auta
grischuna. Dal rest vala l'artitgel 11 alinea 5 da questa lescha confurm al
senn.

⁴ La patenta da chatscha auta, da chatscha da capricorns u da chatscha
bassa autorisescha er il chatschader respectiv d'ir a chatscha da guetta ed a
chatscha cun traplas. Chatschaders che n'en betg en possess d'ina patenta
da chatscha auta, da chatscha da capricorns u da chatscha bassa dastgan
mo ir a chatscha da guetta ed a chatscha cun traplas, sch'els han prendi ina
permissiun correspudenta.

Art. 6 al. 2

² Ina persuna cun dretg d'ir a chatscha po exequir il medem mument mo
ina moda da chatscha.

Art. 7

¹ La consegna da la patenta da chatscha vegn refusada a persunas: Motivs da refusa
a) che n'hant betg adempì lur obligaziuns da mantegniment e da sustegn
fixadas legalmain u uffizialmain;
b) che n'hant betg pajà, malgrà admoniziuns, las taglias sin las entradas e
sin la facultad ch'en vegnidás taxadas legalmain u la taglia d'exemziun
dal servetsch militar;
c) che sa chattan en l'execuziun d'in chasti u da mesiras staziunaras;

- d) che èn sut avugadia, premess ch'i n'è avant maun nagina permissiu da l'avugà;
- e) che n'hàn betg pajà multas, custs, taxas u rembursaments da la valur ch'en scadids, ils quals ellas han obtegnì pervi da violaziuns dal dretg da chatscha commessas en il chantun u che vegnan debitads al chantun a norma da la legislaziun federala u chantunala da chatscha;
- f) che na dastgan betg posseder, acquistar u purtar armas u da las qualas las armas èn vegnidás confisquadas pervi d'ina decisiu giudiziala u uffiziala prendida sin basa da la legislaziun davart las armas;
- g) ch'en vegnidás exclusas da la chatscha tras il departament cumpetent per avair pericolità la segirezza publica.

² Ils motivs da refusa tenor l'alinea 1 da questa disposiziun restan en vigur fin a lur dismessa.

Art. 9 al. 1 lit. a

¹ Sco spezias permessas per la chatscha valan:

- a) a la chatscha auta:

il tschierv, il chavriel, il chamutsch, il portg selvadi, la muntanella, la vulp ed il tais;

Art. 9a

Spezias
protegidás

Effectivs d'animals selvadis protegidís dastgan vegnir regulads a norma dal dretg federal.

Art. 11 al. 2, 4 e 5

² Ils temps da chatscha ston vegnir fixads entaifer las sequentas periodas:

- a) chatscha auta: il mais da settember, tut en tut maximalmain 21 dis cun la pussaivladad d'interrumper la chatscha per la durada dad almain trais dis successivs;
- b) chatscha da capricorns: dal 1. fin ils 31 d'october;
- c) litera b da fin uss;
- d) litera c da fin uss.

⁴ Sch'ils plans da prelevaziun na vegnan betg ademplids durant ils temps da chatscha fixads tenor l'alinea 2 da questa disposiziun, po la regenza ordinar chatschas spezialas per regular ils effectivs da selvaschina che duran fin maximalmain ils 20 da december.

⁵ La regenza relascha las disposiziuns necessarias per realisar las chatschas spezialas. Per quest intent po ella restrencher la valaivladad da la patenta da chatscha sin tscherts territoris, e quai sin basa dal dumber da la selvaschina che sto vegnir sajettada sco er sin basa dal territori da chatscha. Medemamain po ella limitar il dumber da patentas da chatscha.

Art. 12

Il di da la rogaziun federala, la festa grischuna d'engraziament per la racolta (la terza dumengia d'october) sco en en il temp dals 24 fin e cun ils 26 da december è scumandada mintga chatscha.

Art. 13 al. 1 lit. a ed al. 4

- ¹ Las sequentas armas da chatscha dastgan vegnir duvradas:
a) per la chatscha auta e per la chatscha da capricorns: schluppets d'ina
chonna senza magasin e d'in caliber da minimalmain 10,2 mm;
⁴ aboli

Art. 13a

- ¹ Avant il cumentzament da la chatscha sto il chatschader exercitar sia segirezza da culp e trair per regular sia arma da chatscha. La regenza po ordinari ch'il chatschader sto cumprovar ch'el haja ademplì l'obligaziun da tir.

² Il tir da regulaziun per las armas da chatscha sto vegnir fatg en ina chamona da tir assegnada da las vischnancias u en in auter implant da tir permess da las autoritads cumpetentas.

³ Il tir da regulaziun premetta ch'il chatschader respectiv haja fatg in'assicuranza da responsabludad tenor l'artitgel 5 alinea 2 litera c da questa lescha.

Art. 14a

Per chatschaders cun in impediment po la regenza relaschar regulaziuns excepcionalas per l'access al territori da chatscha.

Art. 19

Uschenavant che questa lescha na dispona nagut auter, regla la regenza l'exercizi da la chatscha e relascha las disposizjuns necessarias per quai. Exercizi da la chatscha

Art. 21

Il retgav da las taxas per la patenta e da las taxas da prelevaziun sco er da las ulteriuras entradas da la chatscha ha da cuvrir almain ils custs dals fatgs da chatscha.

Art. 21a

- | | |
|---|-------------------------|
| ¹ La taxa per la patenta da la chatscha auta e da la chatscha bassa importa: | Taxas per la
patenta |
| 1. per burgais svizzers e per esters domiciliads che han almain dapi trais
mais successivs lur domicil en il chantun Grischun: | |
| a) chatscha auta | fr. 669.-- |
| b) chatscha bassa | fr. 269.-- |

2. per burgais svizzers e per esters domiciliads senza domicil en il chantun, che han dentant gi pli baud durant almain diesch onns lur domicil en il chantun Grischun:
 - a) chatscha auta almain fr. 1'300.– e maximalmain fr. 2'000.–
 - b) chatscha bassa almain fr. 500.– e maximalmain fr. 800.–

3. per auters burgais svizzers e per esters domiciliads senza domicil en il chantun:
 - a) chatscha auta almain fr. 2'000.– e maximalmain fr. 3'500.–
 - b) chatscha bassa almain fr. 800.– e maximalmain fr. 1'500.–

4. per esters cun dimora en il chantun:
 - a) chatscha auta almain fr. 4'000.– e maximalmain fr. 6'000.–
 - b) chatscha bassa almain fr. 1'500.– e maximalmain fr. 2'500.–

5. per auters esters:
 - a) chatscha auta almain fr. 8'000.– e maximalmain fr. 13'000.–
 - b) chatscha bassa almain fr. 6'000.– e maximalmain fr. 8'000.–

6. per duvrar in chaun da chatscha:

a) burgais svizzers ed esters domiciliads											
cun domicil en il chantun											fr. 135.--
b) burgais svizzers ed esters											fr. 402.--
cun domicil ordaifer il chantun											

² Per ir a chatscha speziala ha il chatschader da pajar ina taxa per la patenta d'almain 50 francs e da maximalmain 200 francs ed ultra da quai ha el da pajar ina taxa da prelevaziun per la selvaschina d'ungla sajettada. Questa taxa da prelevaziun sto star en ina relaziun adequata cun la valur da l'animal sajettà.

³ Per ir a chatscha da guetta ed a chatscha cun traplas ha il chatschader da pajar ina taxa per la patenta da maximalmain 50 francs, sch'el n'ha betg prendi ina patenta da chatscha auta, da chatscha da capricorns u ina patenta da chatscha bassa l'onn respectiv.

Art. 21b

2. chatscha da capricorns

¹ Per ir a chatscha da capricorns ha il chatschader da pajar ina taxa per la patenta d'almain 100 francs e da maximalmain 200 francs sco er ina taxa da prelevaziun.

² La taxa da prelevaziun importa maximalmain 200 francs per ina chaura-capricorn sco er per bucs d'in fin traïs onns, maximalmain 400 francs per bucs da quatter e tschintg onns e maximalmain 700 francs per bucs da sis onns e passa.

Art. 21c

¹ Las taxas per la patenta e las taxas da prelevaziun tenor l'artitgel 21a alinea 1 cifra 2 fin 5, tenor l'artitgel 21a alinea 2 e 3 sco er tenor l'artitgel 21b da questa lescha vegnan fixadas da la regenza.

3. fixaziun ed adattaziun da las taxas

² Las taxas per la patenta e las taxas da prelevaziun respectivamain ils roms da las taxas fixads tenor l'artitgel 21a e tenor l'artitgel 21b da questa lescha po la regenza adattar a la chareschia.

Art. 21d

¹ Per prestaziuns da servetsch da l'uffizi cumpetent en favur da terzas persunas po vegnir dumandada ina indemnizaziun da l'incumbensader, dal benefiziù u dal chaschunader culpaivel.

Taxas per servetschs

² L'indemnisaziun vegn calculada tenor il temp impundi e tenor ils custs reals.

Art. 27 al. 2

² Surpassan ils disturbis en ils territoris nua che la selvaschina passenta l'enviern la dimensiu usitada al lieu e pregiuditgeschan quels la vita e la prosperitat da la selvaschina, pon las vischnancas limitar localmain e temporalmain il dretg d'access a questi lieus, sche l'intent da questa lescha giustifitgescha quai. Ils interess cuntraris ston vegnir resguardads cun trair quella decisiun.

Art. 30

¹ Per la protecziun dals animals domestics, da las immobiglias e da las culturas da l'agricultura èsi permess als proprietaris da terren ed als fittadins da pigliar u da sajettar senza ina permissiun speziala singuls animals che fan donn. Igl è admess da surdar quest dretg a persunas ch'en autorisadas d'ir a chatscha.

² Animals pigliads u sajettads ston vegnir annunziads immediatamain a l'uffizi cumpetent.

³ La regenza designescha las spezias d'animals, cunter las qualas dastgan vegnir prendidas mesiras d'agid a sasez.

Art. 31 al. 2 e 3

² Per prevegnir a donns da selvaschina po l'uffizi cumpetent ordinar da tut temp da sajettar animals selvadis e permess per la chatscha.

³ La permissiun da sajettar animals protegids che fan donns considerabels vegn dada dal departament cumpetent, premess ch'il dretg federal na fixescha nagut auter. Il departament po surdar questas cumpetenzenas totalmain u parzialmain a l'uffizi cumpetent.

Art. 36

Examen da qualificaziun
1. princip

¹ Las persunas che accupleschan l'onn chalendar almain il 18avel onn da vegliadetgna, che han adempi la prestazion da tgira prescritta, che n'en betg vegnidas sentenziadas a moda legalmain valaivla ils ultims traiss onns pervi da maltractament d'animals intenziunà, ed envers las qualas i na dat nagins motivs da refusa tenor l'artitgel 7 da questa lescha, pon s'annunziar per l'examen da qualificaziun.

² La regenza relascha las disposiziuns necessarias per la realisazion da l'examen da qualificaziun e fixescha tge pretensiuns ch'ils candidats ston ademplir per reussir l'examen.

³ Ella fixescha ina taxa d'examen da maximalmain 300 francs.

Art. 36a

2. excepziuns

¹ Chatschaders che han fatg – en Svizra u a l'exterior – in examen da tir equivalent a las pretensiuns dal chantun Grischun, pon vegnir dispensads da l'examen d'armas e da tir.

² La cumprova correspontenta sto vegnir procurada dal chatschader respectiv.

Art. 44

Organs da surveglianza

¹ La surveglianza da chatscha vegn pratitgada:

- a) dal schef da l'uffizi cumpetent;
- b) dals guardiaselvaschina e dals survegliaders da pestga principals;
- c) dals survegliaders chantunals da chatscha e pestga;
- d) da la polizia chantunala;
- e) da las guardias dal parc naziunal;
- f) da las guardias federalas da cunfin, uschenavant ch'ellas èn autorisadas uffizialmain per quai.

² Il schef da l'uffizi cumpetent, ils guardiaselvaschina ed ils survegliaders da pestga principals, ils survegliaders da chatscha e pestga, las guardias dal parc naziunal e las guardias da cunfin èn organs da las autoritads da persecuzion penala. En cas da persecuzions penals en connex cun la chatscha e cun la pestga han els ils medems dretgs e las medemas obligaziuns sco la polizia chantunala.

³ La regenza regla las incumbensas e las cumpetenzas dals organs da surveglianza da chatscha.

Art. 48

¹ Sin fundament dal dretg chantunal privescha il derschader il chatschader dal dretg d'ir a chatscha per almain in onn e per maximalmain diesch onns, sch'il possessor da l'autorisaziun:

- a) ha maltractà sapientivamain animals sco autur, provocatur u cumplizi dal delict, ha laschè selvaschina sajettada sin il lieu u ha modifitgà selvaschina cun l'intenziun d'engianar;

- b) ha obtegnì cun rampigns ina patenta da chatscha;
- c) ha commess in grev surpassament intenziunà dal dretg da chatscha.

² La privaziun dal dretg d'ir a chatscha tenor l'alinea 1 da questa disposiziun vala mo per il chantun.

Art. 55

La lescha chantunala da pestga dals 26 da november 2000 vegg midada Midada dal dretg
sco suonda: vertent

Remplazzament d'expressiuns

En ils artitgels 19 alinea 1, 21, 28 alinea 1 e 2, 32 alinea 1 e 2 (er marginala), 35 alinea 1 e 36b vegg remplazzada l'expressiun "inspecturat da pestga" tras "uffizi cumpetent".

En l'artitgel 33 alinea 1 litera a ed alinea 2 vegg remplazzada l'expressiun "inspectur da pestga" tras "schef da l'uffizi cumpetent".

II.

Questa revisiun parziale è suttamessa al referendum facultativ.

La regenza fixescha il termin da l'entrada en vigur da questa revisiun parziale.

Votar è pli simpel che quai ch'ins pensa!

Sche Vus essas absenta u absent la dumengia da votaziun u sche Vus duessas esser impedida u impedì da votar a l'urna, avais Vus las suandantas pussaivladads da prender part a la votaziun:

1. Votaziun anticipada

Er en Vossa vischnanca avais Vus la pussaivladad da votar durant almain dus dals ultims quatter dis avant il di da votaziun, u

- da votar a l'urna
u
- da consegnar il cedel da votar en ina cuverta serrada ad in uffizi communal.

2. Votaziun per correspundenza

- Ils documents necessaris (cuverta da resosta, cuverta da votar) survegnis Vus automaticamain da la vischnanca.
- La cuverta da resosta u l'attest da votar stuais Vus **suttascriver** en mintga cas, autramain n'è Voss cedel betg valaivel.
- Plinavant avais Vus duas pussaivladads da votar per correspundenza: Vus surdais la cuverta da resosta a la **posta** u Vus mettais la cuverta en ina **chascha da brevs da l'administraziun communal** inditgada da la vischnanca.

Vossa chanzlia communal As vegn a responder tuttas dumondas en connex cun la votaziun anticipada e la votaziun per correspundenza. Legiai per plaschair er las publicaziuns uffizialas.